



La construcción d'un Polu
Asturianu **énte les eleiciones
asturianes de mayu de 2027**

UN POLU ASTURIANU





polu, el: sust. Puntu caberu [de la exa d'una esfera]. **2** Zona [xeográfica qu'arrodia'l puntu caberu de la exa imaxinariu de la Tierra]. **3** Puntu [de los dos opuestos que tien un cuerpu onde s'acumula la enerxía]. **4** Dulce [fechu con fruta, azucre, chicolate que se xela pa comelu y se-y pon un palu p'agarralu]. **5** Carambelu [de forma arredondiada que tien un palu p'agarralu]



Aína y el Polu Asturianu: ¿de qué falamos?

Un documentu pa esparder énte la militancia y la sociedá

El pasáu 21 de marzu, el IV Congresu d'Aína aprobó por unanimidá proponer la construcción d'un Polu Asturianu énte les eleiciones nacionales de mayu de 2027.

Pero **¿de qué falamos n'Aína cuando nos referimos a un Polu Asturianu? ¿Qué ye y qué nun ye esi Polu Asturianu que nos val de metáfora pa imaxinar otra Asturias?**



Aína considera que:

a. N'Asturies **falta un espaciu políticu propiu, asturianu y non subordináu a otros intereses**, como pasa en casi que toles tierres del estáu (Galicia, Cantabria, Llión, País Vascu-Navarra, Aragón, Cataluña-Isles Baleares-País Valencianu, Andalucía o Canaries).

b. Un espaciu políticu propiu camudaría'l sistema políticu asturianu, que namás se mueve na exa izquierda-derecha. Naguamos por crear otra **exa: cerca-lloñe que nos asitie nel cuadrante de la tresformación dende la cercanía** al país.

c. L'asturiana ye una identidá venceyada a vectores políticos tresformadores, amables, acoyedores. Remite a idees prestoses, de bienvivir, d'imáxenes guapes y de **tradición de llucha que pue valir como palanca pal cambiu social y políticu nel nuestro país y de contención escontra los discursos d'odiu** que, nel contestu nuestro, visten la identidá de los "bonos españoles".



02

Pero **hai muuunchu más asturianismu acuyá d'Aína**, que como partíu -¡y afortunadamente! - namás representa a una pequeña parte d'elli na sociedá. Poro, Aína considera que tien, nesti momentu, qu'apurir el so esfuerzu militante pa la creación d'**un Polu Asturianu ampliu que represente una candidatura asturiana** nes eleiciones a la Xunta Xeneral de 2027.

Aína entiende qu'esi Polu Asturianu ha articulase dende una idea clave: **tien de tar formáu por aquellos actores, tanto colectivos como individuales, que quieran crear un marcu electoral** y, a mediu plazu, organizativu que tenga vocación, acción y obediencia estrictamente asturiana: pa iguar los problemes nuestros, **soluciones a l'asturiana** non condicionaes poles polítiques, estratexes y táctiques que respuendan al ámbitu de lo estatal. **Nun facelo nun supón crear un espaciu políticu asturianu, sinón repetir fórmules conocíes na política propia nos últimos años** (cooptación, entrismu, vivir de prestao, subordinación...) que nun refugamos *per se*, que tienen valor, pero nun ye lo qu'Aína plantea dende la so nacencia por consideralo una fase superada na política asturiana.

04

Pero esta propuesta d'Aína nun pue adolecer de vanguardismu, de dir milenta pasos per delante de la sociedá. Poro, Aína aprobó, tamién, la idea de la validación social p'avanzar nesta llinia. ¿Qué quier dicir esto? Qu'**Aína y los actores políticos que vean la ventana-oportunidá nesti momentu pa conformar esi espaciu políticu asturianu han ser quién a testar a la sociedá** pa determinar si esta propuesta pue tener, nesti momentu, receptividá, viabilidá y de qué manera (económica, mediática, organizativa...) pue facese esta propuesta. Asina:

a. Aína tien de ser quién a establecer un **diálogu permanente con organizaciones y persones representativas de la sociedá asturiana** pa conocer la so opinión no tocante a la propuesta.

b. Aína, en función d'esi **diálogu cola sociedá**, tien de determinar cuáles son les condiciones óptimes, y cómo se llogren, pa presentase a les eleiciones con garantíes: **tipu de candidatura, posibles cabezaleres, elaboración de programa, financiación necesaria, actores políticos** colos que pue llegase a alcuerdos no tocante a la conformación d'esi **Polu Asturianu**.

c. Aína ha diseñar ferramientes específiques (cuestionarios, encuestes, mecanismos de recaldación, recoyida de sofitos online y na cai, actos públicos d'alderique...) pa facer d'esta propuesta política **dalgo serio y ambicioso** nun momentu nel que nun se pue fallar y garantizar la estabilidá del proyeutu. Nun ye namás tirase a la piscina: ye facelo sabiendo qu'hai agua onde amerizar.



05

¿A quién **facemos un llamáu** pa ser parte d'esi **Polu Asturianu**?

- Organizaciones polítiques d'**obediencia esclusiva asturiana**.
- Partíos, plataformes, colectivos vecinales d'**ámbitu llocal**.
- Espresiones sindicales que faigan suyu'l marcu de **rellaciones llaborales** d'Asturies.
- Asociaciones, movimientos sociales y culturales que nagüen por un **espaciu políticu asturianu**.
- Toa persona de la sociedá civil que piense que les asturianes tienen que tener capacidá pa decidir plenamente cómo quieren que seya la nuestra sociedá, de pensar cuálos son los problemes qu'enfrenta y les soluciones a los mesmos; de proponer cuálú ye l'**horizonte futuru** que quieren pal país, ensin qu'**intereses ajenos** nos los vengán a cuntar o imponer.

Animamos a toles que quieren trabayar por esti **Polu Asturianu pa 2027** a garrar esti brinde, tomar la pallabra, escribir reflexones, contactar con otres como vós, plantegar posibilidaes, da-y forma, asociase y esparder l'alderique na vuestra redolada.



Un
polu
asturianu

¿Qué ye un Polu Asturianu?

Ye una ferramienta cola qu'enfocar la realidá asturiana. **Ye** una manera de tresformar el mundu dende equí y dende abaxo. **Ye** romper el tableru d'un sistema políticu asturianu atrapáu pola política estatal. **Ye** una oportunidá pa facer avanzar procesos constituyentes.

¿Qué nun ye un Polu Asturianu?

La estratexa de siempre na que la fuerza del asturianismu se **cede o subordina** a organizaciones que nun cumplen colos mínimos que necesita esti país nesti momentu históricu.





La construcción d'un Polu
Asturianu **énte les eleiciones
asturianas de mayu de 2027**